



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**38. Kalenderwoche – ab 20. September 2009**

## LKWeh-Wahnsinn

Nee, wennsde ma so e baar Schdundn im Schdau schdehn dusd, so off dor Audobahn - dreischburisch - bei finfundreißisch Grad im Schaddn... abor du bisd ja nisch im Schaddn, sondorn de Sonne brassld dir voll off de Karosse! - ...da kommsde dann irschendwie doch ins Griebln. Zuerschd dusde disch nadiehrlich erschdema gräm un dei bersehnliches Besch beglachn. Du hasd ehm de Schdaumeldung im Radjo nisch so schnell midgekrischd. Ehsde begriffn haddesd, dass das deine Schdregge bedreffn dud... vonweeschn zähn Kilomedor Schdau! - da warsde ehm schon ibor de reddende Abfahrd driebornaus. Un so hoggsde also im Schdau, briedesd bei fuffzisch Grad vor disch hin un grämsd disch. Dann fängsde an un freisd disch, dass du nischd mid dähr Ursache von dähm Schdau zu dun hasd - schwähror Unfall mid LKWehs! Siehm BKWehs Dodahlschadn!

Nee, lieber im Schdau hoggn, als wie in eim zorbeuldn Audo mid bludischm Kobb odor so!

Dann kommd abor die Fahse, wo de Freide, dass de noch froh un mundor am Lähm bisd, abebbn dud. Du kommsd langsam ins Griebln. Ja, so is das jednfalls bei mir gewähsn. Ooch bei meinor Gudstn. Wobei die noch das zusätzliche Broblehm hadde, dass ma bullorn mussde. Wose dann nisch mähr annersch konnde, isse ehm ibor de Leidblanke gegleddord, um ins Griene zu komm. Abor so eene Leidblanke heeßd ehm nisch bloß Leidblanke, da leidesde ooch ganz scheen, wennsde drieborgleddorn mussd. Isch meene, mor is ja kee sibzähnjährischor Schbringinsfeld mähr. Un ooch meine Gudste nisch. Ja, die had sisch dann ibor de Leidblanke gegwähld... zum Gligg hadde se Hosn an. Im Rogg ibor de Leidblanke... da dun dann de Schlibbor blidzn, dasses eene helle Freide is. Fiehr de Zuschauor! Zumindesdens Schadnfreide!

Jednfalls sinn mir dann so bei fuffzisch Grad im Blesch ins Griebln gekomm - nähmlisch, ob die

vieln LKWes werglisch off de Audobahn missn. Es dad doch ma die Losung gähm: Von dor Schdraße off de Schiehne! Was issn eischendlich dadermid gewornd? Is die Losung iborhold? Had sisch das mid dor Umwelt un so, midm Zehohzweiausschdoß erledischd?

Nee, dass de LKWes off de Schiehne solln, habbsch lange nisch mähr geheerd. Meine Gudste ooch nisch. Irschendwie muss de Bolledig das Broblehm vorgessn hamm. Un de Bresse had grade mid dor Schweinegribbe zu dun. Un mid de Wahn! Außordähm is dähr ganze LKWes-Wahnsinn schon zu ofd e Dhema gewähsn. Indressierd keen mähr! Schdadds de LKWes off de Schiehne zu dreim, wird immor mähr Audobahn gebaud. Gonjunkduhrbelähbung! Un meine Gudste sachd, wenn die LKWes das bezahl'n missdn, so wie de Bahnreisenden ja ooch dähn Ausbau von de Schiehn bezahl'n missn, dann däd'n die sisch das iborleeschn, ob se de Audobahn nemm! Wobei de dann nadiehrlich offbassn missdesd, dass die dann nisch alle ibor de Landschdraß'n ramml'n dun. Odor gwähr durschn Wald! Bloß, wenn mir so im Schdau daderdriebor nachgriehl'n dun, dann nidzd das nischd. Werglisch schade, dass mir nischd zu meldn hamm.

**Eduard Sachsenmeyer**